



同土地謔哆

逐日有閒俚都會來田坵仔行行啊，田頭田尾影影啊，心肝頭就會蓋鬆爽，係無暗晡頭就會反躁睡毋得。日時頭係無閒時，暗晡夜又乜愛頭那戴探照燈去邏夜田，順續回想時禾仔時放夜水个日仔。搭泥卵仔个泥牯老，將擲田坵犁來種一季，收成後又翻轉去再種，一生人分田坵騙到江江腦轉，日帶夜都望田絡食个耕田人，對土地有蓋深个心。

冬下天，打早六點零天色還暗疏疏仔，騎歐兜拜來到田坵仔，溫度 14 度愛著大襖正毋會寒著。在內埔莊脣，係有一甲兩分零个水果園，種兜檳榔菁、可可、桂花樹、樹葡萄、羅漢松、牛眼樹、荔果、番檨，還有薑黃、栗仔等，想種麼个就種麼个，蓋像百果園。

看著青油油个可可樹，新筍綻滿園，可可果歸年透冬窠窠都有好賣，果實青皮同紅皮都共樣，可可果溝壑轉黃影時就做得摘。載去賣分做巧克力个廠商，一公斤 20 個銀上下罔罔仔，在檳榔樹下加種个雞公髻肉 - 加額个。屋下人想食時，將可可仁用果汁機打打啊，攞優酪乳冰涼後準果汁食蓋合味，愛去拜訪親朋時摘幾粒做等路，盡證真。

過年邊正開花个桂花樹，幾下十頭同時開花時，雪白幼秀个細花蕾花香濃郁，老古人講：「桂花無風十里香」，毋會爭差。花樹下鋪地一層桂花被單，輕輕伏下來鼻燥花仔，分日頭炯燥个桂花有兜火燂味，係用力鼻燥花攞等淡淡个泥味，對鼻公坑沕向心肝肚，透心香。

新晨八早清冷清冷个果園肚，無看著黃揚蝶仔飛上飛下个身影，係影著草叢葉尾頂一隻一隻黃影密麻濟炸，怙怙毋會停動，好命个揚蝶仔還在睡有錢無好買个天光覺。一定係昨晡日跳上跌落無時間，颯啊忒彥正會睡到日頭晒尿肚，係緊喊佢等都詐毋知。見擺去到田坵仔，係會歸園慢慢仔行幾下遍，順續仔拿細竹杷徑剌崎絲，邏田行路正毋會徑人。係不時看著細揚蝶仔界網在剌崎絲項奮奮腦綻，遽遽行前去解開來放佢飛，該載堵著係，正有再飛个機會。

田尾有一間護龍伯公壇，係早仔角莊个南柵伯公，本旦在圳溝脣起三尺四方个小祠，拜一粒伯公石，下後田坵分係買來哩，係寄付三十坪土地分莊民做伯公廟。伯公壇路草毋好，大家愛行田脣路來唱喏，係花一息錢打一條八尺闊三百米長个紅毛泥路透莊中大路，恁呢莊肚仔老人家來拜喏較好行，正毋會橫倒。

寒天來唱喏時，輒常會看著神像脣一對著日著夜个楯燈，紅色个玻璃燈奔項，停等幾下尾壁蛇仔在炙火。企著个位所、做著个事頭，肚屎就會燒爌爌仔。

作者：李得福

☆詞彙學習☆

- | | |
|----------------------------------|--------------------------------|
| 【謔哆】damˊ deˊ：聊天。 | 【炯燥】hogˊ zauˊ：晒乾。 |
| 【將擲】jiongˊ jidˊ：「擲」是南四縣腔的語助詞。 | 【徑剌崎絲】gang laˊ kiaˊ xiˊ：去除蜘蛛網。 |
| 【江江腦轉】dinˊ dinˊ noˊ zonˊ：暈頭轉向。 | 【奮奮腦綻】binˊ binˊ noˊ canˊ：掙扎。 |
| 【窠窠】longˊ longˊ ludˊ ludˊ：零零落落。 | 【唱喏】cong iaˊ：拜拜。 |
| 【雞公髻肉】gieˊ gungˊ gi ngiugˊ：多出的肉。 | 【楯燈】dunˊ denˊ：神桌上銅製或高腳的燈盞。 |